

M136: Arnsteiner Marienlied

- 0,1 –[...] alle dise werlt .
0,2 van der sunnen ez geit
0,3 âne sêr und âne arbeit .
0,4 daz kint daz himel und erden solte ervrôuwen .
0,5 daz ze stoerenne quam unsen riuwen .
0,6 âne aller slahte sêr iz van dir quam .
0,7 als iz gotes kinde aleineme gezam .
0,8 van der sunnen geit daz tagelieht .
0,9 si ne wirdet umbe daz diu tunkelere niet .
0,10 noch bewollen wart dîn magetlîcher lîp .
0,11 alein gebære dû daz kint heiligez wîp .
0,12 sint dû daz kint gebære .
0,13 bitalle dû wære
0,14 lûter unde reine .
0,15 van mannes gemeine
0,16 swenen sô daz dunket unmûgelich
0,17 der merke daz glas daz dir is gelîch
0,18 daz sunnenlieht schînet durch mittene daz glas .
0,19 iz is alanc unde lûter sint als iz êr des was .
0,20 durch daz alange glas geit iz in daz hûs .
0,21 daz vinesternisse vertribet iz dâr ûz .
0,22 dû bis daz alange glas dâ dâr durch quam .
0,23 daz lieht daz vinsternisse der werlte benam .
0,24 van dir schein daz gotes lieht in alle die lant .
0,25 dô van dir geboren wart unse heilant .
0,26 daz beliuhte dich und alle kristenheit .
0,27 diu in den ungelouben verre was verleit .
0,28 iz vant dich . iz liez dich . bitalle lûter
0,29 also diu sunne teit daz glasevenster .
0,30 juden die iuch willet ze gote kêren .
0,31 merket daz glas daz mac iuch lêren .
0,32 in der buoche lesen wir .
0,33 daz Isaias vane dir .
0,34 alsus habet gesprochen .
0,35 die wort die sint belochen .
0,36 ûz van Jesse sal wahsen ein ruote .
0,37 ûfe der ruoten sal wahsen ein bluome .
0,38 an der bluomen sal geruowen der heilige geist .

0,39 her sal sie gesterken mit allen sînen kreften .
0,40 van ime sal sie diu gotes kraft entwâhen .
0,41 dâ mite sal sie den vîant erslân .
0,42 meinet diu ruote dich heilic magedîn .
0,43 bediutet diu bluome dîn trût kindelîn .
0,44 ouch saget uns alsus .
0,45 diu buoch diu dâr heizet Exodus .
0,46 daz Moises ein heilic man .
0,47 sach einen busch dê dâr bran .
0,48 den busch diu vlamme bevienc .
0,49 iedoch her niet ne zergienc .
0,50 her bran unde loubete .
0,51 daz viur ime niene schadete .
0,52 schein van deme busche daz viur .
0,53 daz meinete daz vane dir .
0,54 got hier in erden .
0,55 erbarwet solte werden .
0,56 grunete daz loup in deme viure .
0,57 bluote dâr dîn magetuom in der gebûrte .
0,58 der busch behielt diu sîne schoenicheit .
0,59 sô tete dîn heilic lîp diu sîne reinicheit .
0,60 dînes magetuomes bluome grunet ienoch .
0,61 dû heizes inde bis muoter iedoch .
0,62 daz is daz wunder daz niene geschach .
0,63 daz nie ôre ne gehôrte . noch ouge ne gesach .
0,64 ouch bezeichnenete dich
0,65 wîlent dê mandelen zwîc .
0,66 dê vore gote bluote .
0,67 daz was Aarones ruote .
0,68 dê sament mit den bluomen
0,69 erougenete die mandelen .
0,70 diu pforze beslozen
0,71 gote aleineme offene .
0,72 diu Ezechiêl erscheinen .
0,73 si was ouch dîner zeichene ein .
0,74 man liset ouch ander .
0,75 vile manic wunder .
0,76 dâ mite dîn geburt
0,77 wîlent . vore gekündet wart .
0,78 hette ich tûsent munde .
0,79 gesagen ich niene kunde .
0,80 envollen des wunderes .
0,81 daz van dir geschriben is .
0,82 iz ne mûgen alle zungen
0,83 gesagen . noch gesingen .
0,84 vrouwe dîner êren .
0,85 noch dînes lobes envollen .
0,86 der himelischer hov .

0,87 singet aller dînen lop .
0,88 lobet dich Cherubîn .
0,89 êret dich Sêraphîn .
0,90 allez daz here
0,91 der heiliger engele
0,92 die in gotes antouge
0,93 stênt von aneginne
0,94 prophêten und apostelen .
0,95 und alle gotes heiligen .
0,96 die vrôuwent sich iemer dîn .
0,97 küninclîchez magedîn .
0,98 wole müezen sie dich êren .
0,99 dû bis muoter ires hêren .
0,100 dê dâr himel und erden .
0,101 van êrest hiez werden .
0,102 dê mit eineme worte
0,103 geschuof diu werlt alle
0,104 dem alle dinc sint undertân
0,105 dem niet ne mac widerstân .
0,106 dem alle kraft gewîchet
0,107 dem niet ne gelîchet .
0,108 den dâr êret und vûrhtet .
0,109 alle diuse werlt .
0,110 daz is mir lanc ze sagenne .
0,111 wie hêr dû sîs ze himele .
0,112 iz ne is ouch niemanne kunt .
0,113 âne den sæligen die dâ sint .
0,114 des eines bin ich van dir gewis .
0,115 daz vrouwe sus geêret bis .
0,116 durch die dîne grôze güete .
0,117 durch diu dîne ôtmüete .
0,118 durch diu dîne sûbericheit .
0,119 durch diu dîne grôze milticheit .
0,120 van diu ane ruofen ich dich .
0,121 vrouwe nû gehoere mich .
0,122 allerheiligeste wîp .
0,123 vernim mich süntigez wîp .
0,124 allez daz mîn herze .
0,125 daz vlêhet dir mit vlîze .
0,126 daz dû mir willes genâden .
0,127 ze dîneme sune helfen .
0,128 daz er durch sîne güete .
0,129 mîner missetæte .
0,130 vergezze betalle
0,131 unde mir genâden wille .
0,132 leider mîne ledigheit
0,133 diu hât mich dicke verleit .
0,134 daz ich van mînen schulden

0,135 verworhte sîne hulde .
0,136 vrouwe daz is mir angestlich
0,137 her umbe sô vürhten ich .
0,138 daz er sîne genâden
0,139 van mir sule kêren .
0,140 van diu vlien ich ze dir .
0,141 nû müeze daz stân ane dir .
0,142 wie dû mir maget milte .
0,143 gehelfes sîner hulde .
0,144 hilf mir wâres riuwen .
0,145 daz ich mîne sünden .
0,146 müeze geweinen .
0,147 mit inniclichen trænen .
0,148 hilf mir mit vlîze .
0,149 daz ich diu hellewîze
0,150 niemer en erlîde .
0,151 daz ich ouch vermîde
0,152 hine vort alle dinc
0,153 die wider gotes hulden sint .
0,154 unde ruoche mich gesterken .
0,155 in allen guoten werken .
0,156 daz ich begê mînen lîp .
0,157 alse die heilige wîp .
0,158 die uns aller tugende .
0,159 gegeben habent bilede .
0,160 unser muoter Sara diu ôtmüetige .
0,161 Anna diu gedultige .
0,162 Hester diu milte .
0,163 Judit diu witzige .
0,164 und andere die vrouwen .
0,165 die in gotes vorhten .
0,166 hier sich sô betrageten .
0,167 daz sie gote wole behageten .
0,168 ouch nâh dîner güete .
0,169 nâh dîner ôtmüete .
0,170 muoz ich geschepfen mînen lîp .
0,171 des hilf mir heiligez wîp .
0,172 an dîne hant ich begiben .
0,173 mich und allez daz mîn leben .
0,174 dir bevilhen ich alle mîne nôt .
0,175 daz dû mir willes sîn gereit
0,176 in swelichen mînen noeten .
0,177 ich dich iemer ane geruofen .
0,178 vrouwe dîner hende
0,179 bevolhen sî mîn ende .
0,180 und ruoche mîn gewîsen .
0,181 und mich erloesen
0,182 ûz van der grôzer nôt

0,183 swanne sô der leide tât .
0,184 ane mir sal gescheiden .
0,185 den lîp van der sêlen .
0,186 in der grôzer engeste
0,187 kum dû mir ze trôste .
0,188 unde hilf daz mîn sêle
0,189 werde ze teile .
0,190 den lieben gotes engelen .
0,191 niet den leiden tiuvelen .
0,192 daz sie mich dare brengen .
0,193 dâ ich müeze vinden
0,194 diu êwelîche vrôuwede
0,195 die dâ habent ze himele .
0,196 die vile sælige gotes kint .
0,197 die dâr zuo erwelet sint .
0,198 daz ich müeze schouwen .
0,199 den unsen lieben hêrren .
0,200 den unsen schepfære .
0,201 den unsen heilære .
0,202 der uns geschuof van niwete .
0,203 der uns ouch gekoufte .
0,204 mit sînes sunes bluote
0,205 van deme êwigeme tôde .
0,206 wer sal mir des gehelfen .
0,207 wer sal mich sô geliuteren .
0,208 daz ich des wirdic müeze sîn .
0,209 daz salt dû Jêsus hêrre mîn .
0,210 gip mir hêrre dînen geist .
0,211 wan dû selbe wole weist
0,212 alle mîne krancheit .
0,213 und alle mîn unwizzicheit .
0,214 daz ich müeze schouwen
0,215 mit den mînen ougen .
0,216 dîn unverloschen licht
0,217 daz ne were dû mir niet .
0,218 daz is der êwige lîp .
0,219 daz is daz ich armez wîp .
0,220 mit dîner helfen suochen
0,221 daz lâ mich hêrre vinden .
0,222 des sî mîn bote ze dir .
0,223 dînes selbes muoter .
0,224 ô wie sælic bin ich danne .
0,225 ob sie mich willet vore stân .
0,226 Maria gotes triutinne .
0,227 Maria trôst der armen .
0,228 Maria stella maris .
0,229 zuovluht des süntæres .
0,230 pforze des himeles .

0,231 brunne des paradîses .
0,232 dannen uns diu genâde ûz gevlôz
0,233 diu uns ellenden entslôz .
0,234 daz unse rehte vaterlant .
0,235 nû gip uns vrouwe dîne hant .
0,236 wîse uns ûz gehelfen
0,237 van dere grôzer tiufenen .
0,238 daz is des tiuveles gewalt .
0,239 dar uns in hât gevalt .
0,240 Eva unse muoter
0,241 nû vlien wir alle zuo dir .
0,242 wir weinen unde siuften .
0,243 ze dînen lieben vuozen .
0,244 lâ dû dich erbarmen .
0,245 die nôt die wir armen .
0,246 in dirre tale helden
0,247 manige wîs verdulten .
0,248 stella maris bis dû genant .
0,249 nâh deme sterren der an daz lant .
0,250 daz müede schif geleitet
0,251 dâr iz ze rasten beitet .
0,252 geleite uns an Jêsum .
0,253 dînen vile . guoten sun .
0,254 der sal uns alle genâde tuon .
0,255 in ime solen wir geruowen .
0,256 der sal uns erledigen
0,257 van allen unsen noeten .
0,258 ûz allen tiefen sünden .
0,259 daz sint des meres ünden .
0,260 dâ wir leider inne sîn .
0,261 nû hilf uns heilic magedîn .
0,262 hilf dînen armen liuten .
0,263 die dich van allen landen
0,264 wîtene ane ruofent
0,265 unde des an dir gesuochent .
0,266 kêre daz dîn ouge
0,267 ze dînen diernen . vrouwe
0,268 gehîweten unde megeden .
0,269 und allen guoten witewen
0,270 die sich ze dir kêrent .
0,271 die dînen namen êrent .
0,272 die dir mit vorhten dienen
0,273 die dich mit herzen minnent .
0,274 nû müeze dîne milticheit
0,275 bedenken unse broedicheit .
0,276 al unse nôt diu is dir kunt
0,277 dâ mite wir armen . manige stunt
0,278 alle begriffen sîn .

0,279 nû hilf uns heilic magedîn .
0,280 ich bevillen dînen hulden
0,281 die mîne sunder holden
0,282 die mir sint alse liep .
0,283 alse mîn selbes lîp
0,284 daz dû unsen hêrren .
0,285 gewerdes des gewillen .
0,286 daz er sie behüete naht unde tac
0,287 van aller slahten übele daz in gewerren mac .
0,288 daz er in geben wille
0,289 die sîne lieben hulde .
0,290 unde ze lezzest uns gesamene
0,291 in deme êwigeme lebene .
0,292 Maria milte küniginne .
0,293 nû müezes dû gelobet sîn .
0,294 der dîner ôtmüete .
0,295 und aller dîner güete .
0,296 dâr umbe dich Krist genam .
0,297 ze muoter als iz wole gezam .
0,298 daz den allerbezzisten man .
0,299 der ie in diuse werlt quam .
0,300 daz bezziste wîp gebære
0,301 diu in wîbes künne wære .
0,302 nû müezest dû gelobet sîn
0,303 Maria unse vogetîn .
0,304 trôst der kristenheite .
0,305 schilt der unser broedicheite .
0,306 Maria gratia plenâ .
0,307 dû bis vol aller genâden .
0,308 des heiligen geistes erkorenez vaz .
0,309 daz er ze disen êren sunderlîche erlas .
0,310 ûz van allen wîben .
0,311 die dâr ie geboren wurden .
0,312 milte Maria .
0,313 genædige Maria . süeze Maria
0,314 dînen lop müezen singen .
0,315 aller slahte zungen .
0,316 und alle diu gescheffede .
0,317 diu dâr is in erden ob in himele .
0,318 dîn lop der is alse süeze .
0,319 der gevröuwet al mîn herze
0,320 hê getroestet mich hê gesterket mich .
0,321 dîn lop der is êwîclîch .
0,322 –[...] gelîch dem brunnen der iemer vliuzet
0,323 gelîch deme krûte daz iemer gruonet .
0,324 benedictus fructus ventris tuî .
0,325 gelobet unse hêrre sî .